

Directora di Fundacion Monumento, Anne Witsenburg:

“Nos soño ta hopi mas cu e Faro”

ORANJESTAD – “Nos soño ta hopi mas cu e Faro”, asina directora di Fundacion Monumento, ir. Anne Witsenburg a declara na Bon Dia Aruba.

Sinembargo un proyecto cu nan lo desea di realisa tin di haber cu restauracion den su forma original di edificio monumental di ex Papiamentu Restaurant na Wilhelminastraat. E ta un propiedad priva di famia Arends cu a bira victima di candela.

E ta relata cu e tabata na Hulanda ora cu a haya informacion cu e edificio aki tabata na candela, y practicamente el a hera yora mirando cu un monumento asina tabata na peliger di keda totalmente destrui. Ainda no tin mucho claridad riba e destino cu e doñonan lo kier duna na e

edificio aki.

Sinembargo sra. Witsenburg a bisa cu a base di su experiencia y profesionalismo no ta consehabel pa laga un edificio asina para pa tanto tempo. Aña pasa “Monumenten Fonds” a cumpra e edificio

monumental di San Nicolas Store. E edificio aki tabata para pa mas cu 20 aña, sin haci niun uzo di dje, y e tabata deteriora hopi. Esaki a haci cu nan mester inverti hopi placa pa drecha y pa restaura.

Meta



Igualmente nan ta wak hopi edificio masha bunita rond di Aruba pero nan como fundacion no por haci tur cos. Nan meter keda realistico tambe, ya cu como fundacion nan tin tres meta cu nan kier logra.

Un meta ta cumpra of obtene como donacion edificio monumental cu nan por drecha y cuida debidamente. E di dos meta tin di haber cu promove e conscientisacion di nos pueblo pero tambe nos bishitantenan. “Pasobra si e hende no ta mira e balor di un monumento niun hende ta bay cuide”, el a bisa. E ta realistico cu nan no por cumpra tur monumento di Aruba. P’esey e ta haya cu e hende no solamente mester ta consciente di e balor historico sino financiero di e monumento. E di tres meta ta pa haci tur esey di



un manera duradero. Ya cu si nan ta inverti hopi placa den restauracion pero no ta pensa riba mantencion dificilmente e por ta duradero. Actualmente nan ta organisando e Wiki Loves Monuments Aruba 2014 cu ta consisti di competencia di potret. Cu e tipo di actividad aki y otro tipo di actividad nan kier conscientisa tur hende, desde muchanan di kleuterschool te nos hende grandi, riba e balor di nos monumentonan. □